

Tólf dagar til sveitarstjórnarskosninga:

Vekjum kosninga-baráttuna

Nú eru innan við tvær vikur þar til kosið verður til sveitarstjórna. Það hljómar raunar eins og það geti ekki verið satt miðað við það hversu lítið sveitarstjórnarmál eru til umræðu í samfélaginu.

Í langstærsta sveitarfélagi landsins er staða kosningabaráttunnar líkari því að nokkrir mánuðir væru til kosninga en fáeinir dagar.

Eftirspurnin eftir stjórnámálum og stjórnmalafólki hefur vissulega verið með eindæmum lítil undanfarin misseri og tiltrú almennings til pólitíkusa er líklega í sögulegu lágmarki.

Við þessar aðstæður myndast kjörlendi grínframboðs, Besta flokksins í Reykjavík sem einnig hefur getið af sér afkvæmið Næstbesta flokkinn í nágrennbænum Kópavogi.

SKOÐUN

Steinunn Stefánsdóttir

steinunn@frettabladid.is



Svo virðist sem borgarfulltrúar og aðrir þeir sem í framboði eru til borgarstjórnar af alvöru hafi koðnað niður í aðstæðunum, lagst í vonleysi og talið að best væri

að bregðast við lítilli eftirspurn almennings og háðsglósom Besta flokksins með því að láta sem minnst á sér kræla fremur en að reyna að hrista af sér slyðruorðið, stíga fram og kynna málefni sín með reisn.

Vel heppnuð grínframboð geta verið sem hressandi vindar í alvöru kosningabaráttu. Það er enda yfirleitt tilgangur grínframboða sem vanalega stefna alls ekki að því að ná kjöri. Í svo dauflægri kosningabaráttu og verið hefur hingað til í borginni snýst þó grínið í andhverfu sína. Samkvæmt skoðanakönnunum nær Besti flokkurinn ekki bara inn manni heldur fleiri mönnum. Fari fram sem horfir er líklegt að Besti flokkurinn verði þannig í oddaádstöðu í borgarstjórn á komandi kjörtímabili.

Sveitarstjórnarmál snúast um börnin í samfélaginu, leikskóla og grunnskóla og stóran hluta velferðarkerfisins, þau snúast um skipulagsmál og samgöngur og fjöldamarga aðra hluti sem snerta daglegt líf fólks. Sveitarstjórnarmál eru því alls ekkert grín. Besti flokkurinn grínast þó enn og hefur ekki stefnu í neinum málum sem eitthvað vegna. Stefna flokksins snýst enn um ísbirni í Húsdýragarðinn, ókeypis handklæði í sundlaugarnar og fleira í þeim dúr sem væri auðvitað í góðu lagi ef raunveruleg kosningabaráttu færi einnig fram.

Það eru einungis tólf dagar til stefnu þannig að nú fer hver að verða síðastur að koma fram úr fylgsni sínu. Þeir sem taka þátt í sveitarstjórnarmálum af alvöru verða að standa á torgum og útskýra fyrir okkur kjósendum fyrir hvað þeir standa.

Sitjandi meirihluti verður af sannfæringu að segja okkur hvers vegna við ættum að fela þeim áframhaldandi stjórn borgarinnar og minnihlutinn að sama skapi að færa fram gild rök fyrir því hvers vegna skipta á um stjórn í borginni.

Það gengur ekki að koðna niður undan því að Jón Gnarr og félagar syngi hress lög um að stjórnarmálamenn séu fúllir og leiðinlegir sérhagsmunapotarar. Ef þessir síðustu dagar verða ekki gjörnýttir af frambjóðendum er hætt við að ringulreiðin á næsta kjörtímabili verði verri en nokkru sinni fyrr. Og það er vissulega versti kosturinn.

Fjölmiðlar spyrja ekki

Sigurður G. Guðjónsson, fyrrverandi stjórnarmaður í Glitni, er óhress með fjölmiðla. Þeir smjæðra vist ekki fyrir útrásarvíkingum eftir hrun eins og þeir gerðu fyrir hrun. „Fjölmiðlar spurðu engra spurninga þá – og spyrja engra spurninga nú,“ bloggar Sigurður á Pressunni. „Rætt er við hina nýju eigendur Íslands,“ það er skilaneindir banka, „af sömu lotningu og með sama smjæðurhætti og forðum þegar rætt var við stjórnendur bankanna, sem oftast komust frá viðtölum án gagnrýnna spurninga fjölmiðlamanna.“

Nú, svariði þá

Þetta er nú ekki alveg sanngjarnt hjá Sigurði. Fjölmiðlar spyrja margra gagnrýnna spurninga. Þeir hafa til dæmis sleituliðið reynt að ná í fyrrverandi stjórnendur Glitnis og Kaupþings og beðið þá að skýra sín mál. Og jafnan komið að lokuðum dyrum og talhólfum. Sumir þeirra segja að visu að verjendur þeirra ráði þeim frá því að svara spurningum fjölmiðla. Þá tjáir lítið að spyrja.

Bulls ígildi

Jón Bjarnason, landbúnaðar- og sjávarútvegsráðherra, fór á Selfoss í gærkvöldi þar sem hann fundaði með samráðshópi landbúnaðarráðuneytisins vegna eldgossins í Eyjafjallajökli. Jón hefur getað endurflutt ræðu um öskuregn sem hann hélt spurður um alls óskýld mál á tröppum Ráðherra-bústaðarins við Tjarnargötu fyrir viku. Í þetta sinn hefði vettvangurinn að minnsta kosti verið viðeigandi. Nema Jón hafi látið kné fylgja kviði í bullinu og svarað spurningum um öskufall á þá leið að honum hugnist ekki fyrirhugaðar breytingar á stjórnarráðinu.

bergsteinn@frettabladid.is



HALLDÓR



Dýrkeyptar, óþarfar lántökur

Fjármál Kópavogsbæjar



Elfur Logadóttir
frambjóðandi
Samfylkingarinnar
í Kópavogi

Röð rangra ákvarðana Sjálfstæðisflokks og Framsóknarflokks í Kópavogi á liðnum árum gerir skuldastöðu Kópavogsbæjar líklega 10 milljörðum verri en hún þyrfti að vera. Það þýðir að skera þarf niður sem nemur árlegum rekstrarkostnaði þriggja leikskóla á þessu og næsta ári vegna fjármagnskostnaðar þessara óþörfu skulda.

Þetta stangast á við þá mynd sem meirihlutflokkarnir hafa reynt að teikna upp af stöðunni. Þeir fullyrða að hækkun skulda bæjarins stafi af gengisfalli krónunnar og verðbólgu; staðan hafi verið svo góð fyrir hrun að Kópavogur geti vel tekist á við efnahagsfallið. En er það svo?

Ákvörðun Sjálfstæðisflokks og Framsóknarflokks um að leysa fasteignabráskara undan uppkaupum á hesthúsum í Gladheimum kostaði Kópavogsbúa milljarða og leiddi til þess að semja þurfti við eiganda Vatnsenda um eignarnám á landi. Sem leiddi til þess að semja varð við Garðabæ um afléttingu vatnsverndar, sem aftur leiddi til þess að Kópavogsbær varð að tryggja Garðabæ vatn. Þá eru ótaldir ákvarðanir á tíma spennu og hávaxta um ótímabær lóðakaup og lóðaúthlutanir auk óþarfra framkvæmda við Kópavogshöfn.

Bærinn skuldar nálægt 45 milljörðum þegar allt er talið. Nálægt 1,4 milljónir króna á hvern íbúa. Vegna þessara skulda greiddi Kópavogsbær jafn mikið í fjármagnskostnað árið 2009 og hann varði í félagsþjónustu, menningarmál, æskulýðs- og íþróttamál, umferðar- og samgöngumál og umhverfismál á sama ári.

Fyrir þennan pening hefði mátt halda afgreiðslutíma sundlauganna óbreyttum, sleppa gjaldtöku á eldri borgara í sund, fjölga dvalarrýmum aldraðra, bjóða ókeypis skólamáltíðir bæði í leik- og grunnskólum og hækka fjárhagsstuðning félagsþjónustunnar.

Meirihluti íbúa hefur þörf fyrir breytingar á fjármálastjórn bæjarins. Hagraða þarf í rekstrinum án þess að ógna velferð íbúanna. Gæta þarf aðhalds við ráðstöfun fjármuna en bæta atvinnustig á sama tíma. Það skiptir máli í hvað fjármunum Kópavogsbæjar er varið og frekari lántökur verða því einungis réttlættar að þær hafi ekki áhrif á rekstur bæjarins.

Frambjóðendur Samfylkingarinnar hafa þá þekkingu og reynslu sem þarf til þess að snúa fjármálum Kópavogs til betri vegar og skapa skilyrði fyrir forgangsroðun í þágu velferðar íbúanna.

FRÉTTABLAÐIÐ
ÚTGÁFUFLÉL: 365 miðlar eht. STJÓRNARFORMAÐUR: Ingibjörg S. Pálmadóttir FORSTJÓRI OG ÚTGÁFUFLÉL: Ari Edwald
RITSTJÓRI: Ólafur P. Stephensen olafur@frettabladid.is AÐSTODARRITSTJÓRI: Steinunn Stefánsdóttir steinunn@frettabladid.is
Fréttablaðið kemur út í 90.000 eintökum og er dreift ókeypis á heimili á höfuðborgarsvæðinu og Akureyri. Einnig er hægt að fá blaðið í völdum verslunum á landsbyggðinni. Fréttablaðið áskilur sér rétt til að birta allt efni blaðsins í stafrænu formi og í gagnaböndum án endurgjalds. ISSN 1670-3871

TOPTUL

TILBOÐ!



Verkfæravagn á hjólum

7 skúffur
188 verkfæri fylgja

194.900 kr.

Fullt verð: 219.900 kr.

Verðslanir

www.sindri.is / sími 575 0000

SINDRI

Viðarhófa 6 - Reykjavík / Bæjarhrauni 12 - Hafnarfjörður